

ERAKUNDE AUTONOMOAK ASTEARTEAN BERRIZ ABIAN JARTZEKO AGINDU DU LONDRESKO GOBERNUAK

Unionistak Gobernura itzultzeko bozketa irabazi du Trimblek, ozta-ozta

■ UUPko buruaren proposamena alde txikiarekin onartu da, Kontseiluko 459 kidek baiezkota eta 403k ezekoa eman baitute

■ Akordioaren kontrako UUPko kideek IRAren desarmeaz presionatzen segituko dutela esan dute

■ Sinn Feinek begi onez hartu du erabakia, batez ere errepublikanoen baldintzarik jarri ez zaielako

Jose Mari Pastor / Belfast
Berriemaile berezia

BOTO GUZTIEN %53rekin izan bazen ere, UUP Ulsterko Alderdi Unionistako presidente David Trimblek aurrera atera zuen Sinn Feinekin eta beste alderdiekin batera Ipar Irlandako Gobernu autonomora itzultzeko proposamena, atzo Belfasten egindako bileran. Ulsterko Unionisten Kontseiluak —UUPko goren organo erabakitzailea— bat egin zuen Trimblerekin. 459 delegatuk eman zioten sustengua UUPko buruari, eta 403k haren hautuaren kontra bozkatu zuten. Boto bat baliogabea izan zen.

«Ez dugu egunik jarriko, baina ni eta nire kideak erne egongo gara errepublikanoek esan dutena beteko ote duten. Horiek atzeratzeak arazoak ekarriko ditu», esan zuen Trimblek bozketaren ondoko prentsaurrekoan, IRAk hilaren hasieran armak «erabileratik at» uzteko egingandako eskaintza gogoan.

Buruzagi unionistak Ipar Irlanda eta unionismoaren aurrerapenaren aldekotzat jo zuen Kontseiluaren erabakia,



PAUL FAITH / AP

David Trimble prentsaurrekoa ematen Belfasten, bere alderdia Gobernu autonomora itzultzea erabaki eta gero.

eta IRAren su-etenaren emaitzak gogoratu zituen. «1999. urtean, lehen aldiz 30 urtean, ez zuten polizia edo soldadurik hil Ipar Irlandan», esan zuen.

IRAren desarmean presionatu

IRAren desarmea gauzatu gabe Sinn Feinekin Gobernuaren sartzearen kontrakoek pauso hori exijitzen segituko

dutela esan zuten. «Desarmean aurrera egin ez bada, presionatu egingo dugu, eta berriro elkartu beharko dugu hemen», adierazi zuen Trimbleren proposamenaren aurkakoen buru Jeffrey Donaldson. UUPko politikariak plan alternatiboa presatua zuen atzoko bilerarako, baina azkenean ez zien aurkeztu Kontseiluko delegatuei. Horren ondorioz, Trimbleren mozioa baino ez

zen bozkatu. Donaldsonen Asanblea berriz abian jartzea nahi zuen; ez, ordea, Gobernu autonomoa. Exekutiboa «IRAren desarmea hasi eta gero» funtzionatzen hastea nahiago zuen berak, baina Trimblek gaitzetsi egin zuen posibilitate hori ostiralean.

Erakundeak asteartean abian

Ipar Irlandarako ministro

britainiar Peter Mandelsonen ongiatorria eman zion UUPren erabakiari. Mandelsonen arabera, bake prozesuak aurrera egiteko «bigarren aukera» lortu zuen atzo. Mandelsonen erakundeak eteteko legea indargabetzeko agindua eman zuen atzo. Bihar jaieguna da Ipar Irlandan eta, hori dela eta, Asanblea eta Gobernu autonomoa asteartetik aurrera hasiko dira osterara ere lanean.

Sinn Feinek ere onetsi egin zuen unionisten bozketaren emaitza. Martin McGuinness «pozik» azaldu zen unionistek Stormontera itzultzeko baldintzarik jarri ez izanagatik, eta «azkenaldian egin zuten huts bera egin ez dutelako», hau da, euren aldetik IRAri desarmerako ultimatum bat ezarri ez ziotelako. «Oso erabaki pozgarria da irla honetako biztanleentzat», esan zuen McGuinness.

Alderdi errepublikanoen presidentea Gerry Adams ere goretzi egin zuen unionisten ebazpena EEBBetan egin ari den bisitaldian. «Unionistek sustengua eman diote Trimbleren jarrera positiboari», esan zuen Adams New Yorketik.

Belfasteko kaleetan

Jose Mari Pastor

Jeffrey, hurrenaren zain

■ Irlandako Poliziak Benetako IRAko ustezko zortzi kide atxilotu izana hizpide izan zen atzo Belfasten. Unionisten bilera erabakigarriaren bezperan Garda-k egindako operazioa Dublingo oparitzat jo zuten askok, UUPren bake prozesuarekiko sostengua lortzeko xedez.

Izan ere, IRAren armen inguruan egin den eztabaida gai nagusia izan zen Waterfront Hall-en. Trimblek eta UUPko gainontzeko kideek ez

zuten, jendaurrean behintzat, RUCi buruz asko hitz egin. «Errepublikanoek konpromisoa betetzea» izan zen eskaera ia bakarra.

Eraikin biribilaren kanpoaldean elkartu ziren herritarrek ere nahi hori agertu zuten, baina modu oldarkorrako batean. Unionista amorratuenei «traidorea» eta «gezurria» deitu zioten Trimbleri, UUPko burua sarrerara hurbildu zenean. «Armarik ez, Gobernurik ez. Hori guz-

tia gezurra zen, Trimble», zioen pankarta batek. Sarreraren ondoren figura deigarri batzuk jarri zituzten Gobernura itzultzearen kontrakoek: artzain beltza eta ardi beltzak. Artzaina Sinn Fein-IRA zen; ardiak Trimble, McGimpsey, Maginnis eta abar.

Trimblek areto barrutik erantzun zuten kritikei, erakundeak berpiztea irtebide posible bakarra dela esanez. Eta errepublikanoen abisua egin zuten: armen auzian aurrerapenik ez bada, «arazoak» izango dira berriro.

Unionistek ez zuten datarik agertu nahi izan IRA «armak erabileratik at» uzten hasteko, azken batez datarik ez dagoelako. Proze-

suak urtebete iraun behar du. Datoren urteko uda du amaiera, baina ez du hasiera zehatz-zehatzik. UUPko kide intransigenteen aukera izango dute hiru edo lau hilabeteren buruan bazterrak nahasten hasteko, IRAk mugimendurik egin ez badu.

Hurrengo krisia, beraz, udaren ondoren izan liteke Ipar Irlandan. Jeffrey Donaldsonen ez du etsi, ez baitu uste desarmea egongo denik. Horixe esan du behin eta berriz. UUPko disidentea Waterfront Hallen berriro elkartzeko irrikitan dago. Trimbleren kontrako azken baitaila izango da hura. Eta garaileak beste izen bat izango du orduan: Jeffrey.